



Men Steiner muossa als partecipants la chanzun da la storta da Crusch.



Il Fränzli Domenic Janett lascha dudir sia proposta per laccumpagnamaint d'ün toc.

Lavuratori Fränzlis cun tants partecipants sco mai

Eir per l'ultima ediziun dal festival spordscha il XONG lavuratori da musica e chant. Da quel dals Fränzlis a Tschlin piglian part 37 persunas ill'età da desch fin settanta ons.

■ Da Flurin Andry/anr

Our da la sala polivalenta da Tschlin as doda vuschs e suns dad instrumaints: Las 37 partecipantas e partecipants dal lavuratori dals Fränzlis sun pronts per cumanzar. Il lavuratori vain manà dals Fränzlis Domenic e Curdin Janett e da sia figlia Madlaina Janett sco eir da Men Steiner. Per cumanzar muossa el als preschaints la chanzun «A Crusch rivà pro l'ustaria». Lura surpiglia Domenic Janett la direziun, cun sia clarinetta suna'l la melodia d'ün dals tocs da musica populara cha'ls partecipants impredan quist'eivna e propuona lura differents variantas per accumpagnar. «Pro nos lavuratori nu faina be musica», infuor-

mescha Men Steiner, «in chantond chanzuns rumantschas preschantaina eir la lingua e cultura rumantscha.»

Musica populara chi's müda

Duos terzs dals 37 partecipants dal lavuratori d'ingon derivan da la Svizra bassa, duos vegnan da Vienna ed ün da München, ils oters sun indigens. La gronda part dals partecipants d'utrò cugnuschaivan fingià l'Engiadina Bassa, han fat qua vacanzas o chi possedan üna chasa o ün'abitaziun da vacanzas illa regiun. Ils oters sun gnüts causa chi cugnuschan ed han jent la musica dals Fränzlis da Tschlin. Ils blers sunan la clari-

netta, oters trumbetta, saxofon, orgel da man, gĩa, giun, guitarra, cello, flöta e flöta a travers, clavazin ed apret. «La musica populara vain datta inavant da bocca o instrumaint ad uraglia, minchün suna sco ch'el doda e resainta la melodia», disch Men Steiner, «nos böt es perquai da sunar plü bler pussibel our dad oura, minchün dess avair il spazi necessari dad esser spontan.» La saira dan ils partecipants pitschens concerts mincha jada sün ün'otra piazza da Tschlin. Fin la fin da l'eivna varan ils partecipants ün repertori da 10 tocs, per part tradiziunals, per part novas cumposiziuns dals Fränzlis. Causa mancanza da finanzas sarà il Xong 2010 l'ultim dals festivals dals trais pajais. Quai nu vuol però dir cha quist saja eir l'ultim lavuratori culs Fränzlis: «Il grond interess per nossa sporta ans motivescha d'examinar schi nu dess la pussibilità d'organisar eir prossem on darcheu quist lavuratori», manzuna Men Steiner.



Al lavuratori dals Fränzlis a Tschlin as partecipeschan musicists da minchetà.



Al lavuratori a Tschlin nu vain neir l'umur a la cuorta.

Fotos F. Andry